

四庫全書

史部

欽定四庫全書

皇朝通志卷九十三

食貨畧

十三

市易

臣等謹按我

朝市易之政近自直省都會遠及外藩重洋靡不各有定制永昭法守逮自西陲底定歸附益廣度地開墾因中設市其通商惠工柔遠能邇之規實足

為百代之良法豈若漢唐以來補偏救弊經理一時者之所為粵稽鄭志所載平準均輸乃漢武時權宜之術自後漢章帝時僕射朱暉已議其失且鄭志所載亦止武帝章帝二事其非經常之制可知我

國家藏富於民盈寧樂利家給人足其立綱陳紀皆準理酌宜以便民為重迥非置平準於京師籠天下之貨物者可比謹於篇目改書市易而以市舶

互市附焉

順治二年

上諭江寧蘇杭各處織造市賣紬緞務寬長精密毋短窄
鬆薄致民間徒費錢財無裨實用並禁止各莊頭採買
芻糧勒價強買之弊六年

敕令東來賣參人役止許在京均平易市不得遣往別省

滋事

按元年令該商於南京揚州濟寧臨清四處開
市後以擾累地方官民商賈故有是命

又

嚴禁王府商人旗下莊頭人役等霸佔集場出外

貿易及短價措買之弊

康熙初民間有指稱王貝勒輔政大臣名色據關
津肆行者

上飭地方官緝拏續定包衣下人王貝勒貝子公大臣家
人霸佔關津生理及王大臣以下各官以銀借貸
居民指名貿易及據關口市場者罪例時尚孔逆
藩所屬多有霸佔廣東私市者十九年令該管官
清釐其有霸佔私稅者罪之二十四年以光祿寺

估計物價頭緒繁多

令凡應買各物俱照時價估計定為條款嗣又以核減太多恐累商戶

諭大學士等再行斟酌隨時估計四十三年革除直省私設牙行

敕戶部造鐵斛升斗頒行天下先是湖廣道御史郝浴言官吏採買軍需往往層扣戶侵名為市易實係里攤請行嚴禁至五十九年吏科給事中紀遴宜又

言河工所需物料任河廳採買差役不無借端擾累嗣後凡置辦工料請飭河廳協同地方官平價購買並從之

雍正六年

諭向來採辦軍需有司往往虛耗國帑派累民間節經降旨嚴行禁飭令照時價購辦又恐承辦官預留為將來核減之地稍借民力以助公事是以特令核定折中價值倘時直可減即為節省或定價不敷據實奏明此後

再有剋扣短發侵蝕之弊一經題叅即核明剋扣之數先動軍需銀兩另委賢員如數找給百姓仍將該員治罪勒限追完九年以總督鄂爾泰言

敕各省文武官所有賞給兵營生息銀兩毋得占百姓行業或重利放債與商賈小民爭利時京師錢價昂貴上言者謂商賈販運出京及囤積居奇所致乃於八旗五城設官局兌換以平市價又淮安板閘地方向有豪民開立寫船保載牙行勒索行旅十三年

敕該督撫嚴行禁止布政使不得濫給牙帖其他處關口
有似此者亦一體禁緝又禁河工運裝工料封阻客船
及採辦諸物短價累民之弊

乾隆元年禁商人增長物價巧取兵丁營運銀兩
二年復申飭居竒勒價之禁是年嚴牙行侵吞商
客資本之禁令地方官於牙行領帖時取具保隣
甘結不得濫行給發四年以直省牙行歲增

詔令各督撫嚴加核實於是定牙行之例凡鋪戶拖欠

商本追繳本牙行帖勒令舖戶清完其不足之項

牙行賠補如牙行侵蝕者並責互保牙行攤賠

舊例

仍充經紀取同牙行互保一人出具殷實良民互結至於以後客之貨挪補

前客之欠移弱客之貨代償強客之欠准互保先行舉首免其治罪容隱者責令分賠其牙行內同事人侵吞客本均律以牙行侵吞之例尋又奉

旨外省衙門書役多有更名捏姓兼充牙行交部定例治罪地方官失察徇縱亦均論罪五年定各省開報

物料價值之例又增寧夏採買糧食價值七年於

京城立錢牙以平錢價

按此條互見錢幣門

又令將平糶錢

文照市價酌減易銀

互見錢幣門

又定額解京局銅鉛

及歲貢物料皆隨時增直鹽務額引亦隨時撥濟

按地行銷

互市市舶之制

順治二年

命哈克薩哈駐張家口們都布齊駐古北口凡外藩貿易

者該駐防官照常貿易毋得阻抑又定西陲招商市茶
以易番馬酌量價直例先是佛浪機商人於明季
寓居壕境澳門與粵商互市後因關入省會遂飭禁
止四年以廣督佟養申請仍准番舶互市十一年
准暹羅貢使所攜貨物願至京師貿易者聽其自
運其願在廣東貿易者督撫委官監視十三年准
荷蘭國及吐魯番貢使在館交易十八年又准達
賴喇嘛及根都台吉於北勝州互市

康熙初年定外國人非進方物之時不准來境貿易旋又禁沿海兵民販米糧出海市利八年廣東都司劉世虎等遇風飄泊廣南國境國王遣其臣趙文炳送歸並帶貨物船隻來粵部議趙文炳等雖係廣南印文遣來實係中國之人或留或遣請

旨定奪其帶來之物現奉海禁不便貿易應入戶部得

旨廣南國王送劉世虎等回粵殊為可嘉著給以照驗遣歸廣南船貨不必入官仍給來使嗣於二十二年令厄

魯特噶爾丹博碩克圖來使酌量數人進關其餘
聽在張家口歸化城等處交易事畢隨即遣回時
阿達哈哈番瑪拉等以茶布往征羅刹軍前市易
上諭茶布不必攜往可於戶庫支銀四千兩量買諸物馳
驛抵該地換取牛羊糧米以備軍需二十三年奉

旨開海禁許江南浙江福建廣東沿海民人用五百石以
上船隻出洋貿易地方官登記人數船號給發印
票防汎官驗放又准暹羅國貢船在虎跳門貿易

具報之後即放入河下不必入店封鎖候部文批
回二十四年免外國貢船抽稅時王大臣等言今
海內一統寰宇寧謐無論滿漢人民一體令出洋
貿易以彰富庶之治得

旨允行又令朝鮮國照常貿易二十五年定厄魯特部落
如噶爾丹等四大台吉准令來京互市其餘小台
吉俱於張家口互市著為例二十八年暫開寧夏
等處互市先是領侍衛大臣索額圖等與俄羅斯

來使議定分界事宜至是遣官立碑於界凡一切
行旅有來往文票者許其貿易不禁自是遣使通
貢互市不絕三十五年令洋海商船往天津海口
運米至奉天販賣給以僱值其裝載貨物但收正
稅概免雜費時進征噶爾丹

特諭隨軍貿易之人固不可少若縱其貿易又至紊亂應
於某營相近即令某營之夸蘭達派出章京於一里外
駐劄准其貿易倘貿易人不遵法禁即行正法隨帶之

人亦治罪軍士或私售米糧及強買搶奪定加重罪又
理藩院言官兵經行蒙古地方應令蒙古人沿途
販賣駝馬牛羊等物得

旨理藩院可另設一營其販賣駝馬牛羊人等即在理藩
院營內貿易每軍營派官一員專司其事如有指稱貿
易行竊者不分首從以軍法論三十六年准鄂爾多斯
於定邊花馬池平羅城貿易時朝鮮國比歲薦饑
公私困窮八路流殍相續於道國王李焯籲請中

江開市買穀

上允其請並令戶部侍郎貝和諾往奉天督理朝鮮糶米
事務尋定令殷實之戶取具地方官印結前赴奉
天領米輓運照時價交

盛京戶部其朝鮮國進貢來使有買穀帶回者聽候
朝鮮國歲稔時停止明年復

遣吏部侍郎陶岱將所運米三萬石以一萬石賞賚朝鮮
以二萬石平糶時有鹽商呈請願往令將鹽務銀

買倉米二萬石運往平糶

欽差戶部侍郎監視

臣等謹按

國家懷柔遠人無所不至朝鮮世稱外藩恭順日久
至是因急告糶即

命部臣截漕運米以蘇海邦民氣朝鮮臣庶得飫

太倉玉粒莫不忭舞忻悅實從來未有之曠典也

三十二年以日本洋銅饒裕令安徽江蘇浙江江

西等省各商攜帶綢緞絲斤糖藥往彼處市銅分
解各省每歲額市四百四十三萬餘斤三十九年
准哈密人於甘肅貿易又准湖廣鎮筭苗民於每
月三日聽其互市限時集散四十一年

遣官偕喇嘛監督打箭鑪貿易四十六年令出洋漁船照
商船改造雙桅裝載貨物兼行貿易四十七年都
察院僉都御史勞之辨言江浙米價騰貴皆由姦
商販運外洋之故請申飭海禁不許商船往來戶

部議以開設海關商民兩益不便禁止祇令該督
撫提鎮於江南崇明劉河浙江乍浦定海各口加
兵盤緝私販米糧於是著部院保舉賢能司員前
往巡察五十一年兵部職方司郎中圖理琛使土
爾扈特國假道俄羅斯悉其山川風俗為異域錄
以獻初通市諸物有噶噶林印記者准市餘則否
五十三年以江蘇巡撫張伯行言編刻商船漁船
巡哨船字號並船戶人等各給腰牌以便巡哨官

兵稽查五十五年給甘肅地方出口印票聽其貿易又定福建商船往臺灣澎湖貿易者臺灣廈港兩汛撥哨船護送時以南洋有呂宋噶喇吧兩處係紅毛西洋泊船之所其地多匿藏盜賊官兵出哨船止一二隻一遇盜船四五隻勢不能敵又內地民人希圖獲利往往私載米糧販易或并將去船售賣甚至有留在彼處者

上以該地常留漢人即海賊之藪又往年由閩運米至粵

所僱民船三四百隻每隻三四十人通計數千人
聚集海上而臺灣民人時與呂宋人往來皆當加
意防範因

召廣州將軍浙閩總督兩廣總督入京

詔大學士九卿等會同詳議嗣於五十六年議定內地商
船照舊來往東洋不許出南洋貿易其外國夾板
船仍聽其貿易凡洋船初造時報明海關監督地
方官親驗印烙取船戶甘結并將船隻丈尺客商

姓名貨物及收泊何處填給船單沿海官照單嚴查按月冊報督撫存案每日食米人各一升餘米一升以防風阻如有越額載米者治罪其私賣船隻偷越禁地或留在外國者殺無赦五十七年定來往臺灣各船取具保結赴廈門盤驗其保結商船責之保家商船水手責之船戶貨主漁船責之澳甲同艚各船限定人數凡單身遊民無照者不許偷渡犯者官兵船戶民人及該管官一體論罪

時碣石總兵官陳昂言夷商種類甚多姦宄莫測
應令督撫關差諸臣設法防備部議夷商憎服有
素應聽其照常貿易沿海文武官弁但於夷船泊
岸時不時防衛無致失所從之又以兩廣總督楊
琳言禁止澳門夷商夾帶中國之人并內地商人
偷往別國貿易時以止禁商船往南洋而夷船往南洋及內地商人往安南不在禁
例永著五十八年議定蒙古及西藏茶禁六十一
年

諭暹羅國分運米石至閩粵等處販賣其餘各邊番部落
及苗疆土司祇令在就近邊界交易不得多攜人
衆深入內地至硝磺廢鐵軍器火礮等物槩不准
夾帶出邊其進關抽稅多從輕減云

雍正二年

諭暹羅國不憚險遠進獻稻種果樹等物應加獎賚其運
來米石所至地方官悉照粵省時價發賣不得任意低
昂其回空壓載貨物概免徵稅嗣後陸續開閩浙洋禁

及邊番互市之禁先是青海諸部落每年於二八月在河州松番兩處與內地民人交易兩次後擇定納喇薩喇地方為集場改定四季交易而各部落多居住黃河之東切近河州松番等處所有納喇薩喇兩處交易之所不足供黃河東西兩翼蒙古易賣三年將軍岳鍾琪言河州土關附近之雙城堡松番黃勝關之西河口俱有城堡房屋地方寬濶水草肥甘應仍令在此互市可為永久再住

牧黃河西諸部落相近西寧請移貿易之地於西寧口外當噶爾寺至蒙古貿易全藉牲畜每在六月以後請每年不定限期聽其不時貿易從之五年福建督臣請復開閩省洋禁以惠商民並令出洋之船酌量帶米以佐內地耕耘之不足

上如所議並令該督撫立定條規嚴加防範其從前逗遛外洋之人不准回籍五年令大臣策凌等與俄羅斯使臣定議邊界立石碑並定議俄羅斯往恰克圖互

市人數不得過二百仍令理藩院司官一員稽查
六年准暹羅國商人運載米石貨物在廈門發賣
止納貨物稅米穀免稅永為例又定洋船出入海
口限期及酌帶米石貨物之數七年准浙江洋船
照閩海例與南洋一體貿易並准粵東商人每歲
冬春間以茶葉瓷器色紙諸物往柔佛諸國互市
許暹羅貢使購買駝馬並動用內庫銀給以價值
又賞給京弓銅線

以該貢使請採故也

定湖南民人往苗土

貿易者給與印照塘汛驗照放行其苗人至內地
貿易於苗疆分界之地設立市場該州縣派委佐
貳官監視每月以三日為期不許越界出入先是
呂宋等國口岸多聚漢人將南洋貿易禁止是年
復令通市如故十三年議定東省豆船經海運到
江設立兩聯印票出入查驗如無印票照販米出
洋例究治時呂宋國以麥收歉薄請以穀銀海參
來廈門交糴

上諭該督撫提督轉飭有司照穀麥時價均平糶糴不許內地人抑勒欺詐其自開海以來各項禁物仍不許出境并申明沿邊軍民藉端需索勒措之弊

乾隆元年暹羅國請採買銅斤部議以銅斤禁止出洋定例已久恐後來姦民藉此為由越境滋弊議不准採

上命賞給八百斤後不為例又准山西口外民人攜帶日用鐵器其烏鎗腰刀及鐵條鐵塊可造軍器者

仍行禁止二年

命朝鮮國仍循舊例在中江地方與兵丁交易八年酌定外洋貨船帶米萬石以上者免貨稅十分之五五千石以上者免十分之三其米照市價公平發糶若地方不能銷售官為收買以補常平社義等倉或散給濱海標營兵糧之用自是高船往暹羅者亦多攜米歸來官照時價就廈口糶賣分散漳泉二郡其商民有自備資本運米至二千石以上

者按數分別生監民人賞給職銜十一年葫蘆國
酋長蚌筑願以其地茂隆山銀廠抽課報解作貢
解課三千七百九兩零赴雲南投誠且稱境內銀
廠自中華人吳尚賢開採以來礦砂大旺廠地民
人各守

天朝法度路不拾遺等語王大臣等議令雲南督臣曉
諭却之仍令將吳尚賢等違例出境查明具奏從
之尋葫蘆國夷目仍籲請

天恩俯順夷情收受厥課雲督張允隨請減半收納以
所收之半給賞該首長以慰遠人歸順之意從之
先是漢人往噶喇吧貿易留者甚衆生長其地者
曰土生仔司漢人貿易者曰甲必丹時福建龍溪
縣民陳怡老久居其國賄通夷目謀充甲必丹於
十四年潛回廈門為地方官訪獲

上聞仍令照例速遣二十四年西陲底定自闡展庫車
阿克蘇烏什和闐葉爾羌喀什噶爾等處均設市

集內地運往者綢緞褐氈色布茶封易回部驢馬
牛羊翠羽花翎毛革金銀銅貨及麥蕎芻芡以實
邊境軍儲或遣官監運或聽軍民販載其物價悉
照內地價直交易是年禁外洋夷船販運絲斤明
年江蘇巡撫陳宏謀言各關差招商採洋銅向係
置辦綢緞絲斤并糖藥等貨今絲斤已禁若將綢
緞一概禁止所帶粗貨不敷易銅請將綢緞紵絹
等准其買辦尋議將該商額辦銅本所有應需酌

搭綢緞及裝載船隻酌定捲數斤兩責成乍浦上海二處官照例秤驗輸稅使商人不得重複影射
二十七年

命開奉天海禁並定給票互查之例二十八年禁嘆咭
喇商船不准於浙江貿易自是皆收泊廣東又陸
續准嘆咭喇喇吧荷蘭等國夷商及琉球國配
買絲絹以易外洋銅斤二十九年准兩廣浙閩各
商攜帶土絲及二蠶湖絲往柔佛諸國貿易此後

外藩貿易悉照常例至於西域藩部來新疆貿易者各有常例如哈薩克諸部於伊犁貿易布魯特諸部於喀什噶爾貿易痕都斯坦諸部於葉爾羌貿易齊齊玉斯謬爾根齊諸部常至伊犁等處貿易又定外藩商人在回部貿易者三十分抽一皮幣二十分抽一回部商人往外藩貿易者二十分抽一皮幣十分抽一其牲畜貨物不及抽分之數視所值低昂以普爾折算四十二年兩金川番酋

平定亦令於該地設市定制以通貨賄四十九年
諭留京辦事王大臣議覆福康安舒常等籌酌粵東洋
行事宜內稱該督撫及監督等土貢內購買洋貨鐘
表等物務令洋行各商公同定價又洋行貨內珍珠
寶石等項抽稅易於偷漏應令總督監督等悉心籌
酌以期永久無弊等語國家撫馭外洋不貴異物每
歲番民與內地洋行交易貨物俾霑利益原所以體
恤商夷至洋貨內鐘表等項不過備驗時刻向來粵

海關原有官買之例而廣東督撫監督等往往於土貢內亦有呈進者今內務府造辦處皆所優為更無事外洋購覓嗣後督撫等於鐘表一項永不准再行呈進至珍珠寶石等項原無需用之處向來粵海關抽稅亦屬無多况此等物件本難定價易至居竒且便於攜帶藏匿難保無偷漏分肥否則過於吹求若設法嚴禁逐項搜查實屬不成事體現在京師及各處關隘商稅則例內本無此項稅課不如聽商人等

自行交易免其收稅凡粵海關珍珠寶石驟不准征
收稅課著為令

皇朝通志卷九十三

欽定四庫全書

皇朝通志卷九十四

食貨畧

十四

漕運

臣等謹按秦輸渤海之粟漢運關中之糧此漕運之名所由昉自漢及元率皆水陸兼運故有長運遞運之名至明永樂間開會通河以濟漕始罷海運陸運而為儲運其後又變支運為兌運復為改

兌於是罷民運而專以軍運

國朝因之然明代軍民交兌司漕者往往左軍右民以致軍強民弱需索無饜始則瘠民以肥軍而民不任漕繼且瘠軍以自肥而軍不勝運我

朝則改為官收官兌而於運丁尤加意體恤其在家也有贍運之屯田以為世業其在途也有官給之行月以備糗糧贈貼銀米費雖浮而不恤隨帶土宜利雖倍而無征此

國朝之漕運所以民勤秭秬而額鮮侵虧軍樂委輸而期無違悞也茲仍按年臚載以永垂不刊云至列聖相承百餘年來偶遇偏災或裁運或免征已列蠲賑中茲無贅焉

順治二年定漕運官司輓運設旗甲統領設運總督押則設漕道糧道提衡巡察則設總漕巡漕四年定各省漕船額缺者給以重運銀令運軍雇募民船裝運七年裁巡漕御史先是漕糧軍民交兌

軍強民弱每多勒索九年定為官收官兌其贈貼銀米酌令徵收以給運軍民甚便之十年製鐵斛頒發倉場又以白糧無漕船令攢廠成造十二年定漕運限期時運漕軍丁多有竄入民籍者是年定五年編審一次十三年定京城通州各倉收米限期尋飭各衛所舍餘閒丁按年編審納銀以為貼造漕船之費十七年令折徵灰石米解部給支明年禁折徵漕糧毋得以兌漕為名價外苛索

康熙元年

諭漕船領運官軍依限抵通回空不守成法者罪之其沿途文武官催儻不力者並論罪二年令漕運總督刊發各省漕運全單並定漕糧分數以嚴考成時浙江白糧用漕帶之法需船百二十六號三年增造六十四號並入漕幫僉運尋定江蘇白糧照浙江之例抽選漕船裝運五年更換又定漕船抵通限十日回空之例十一年定抵通期限以省分遠近為

差違限者計月論罰督運白糧違限者亦如之十
七年增定重運回空沿途限期除江西湖廣漕船
行長江至儀徵者因風挽運難以立限外惟鎮江
渡江因風守候令地方官報明免議餘俱照新定
例行淮北漕糧向例止收紅米時河患初平民田
被淤因而有改種白稻者以河道總督靳輔疏准
紅白兼收著為令二十三年定漕船載運額數每
船載正耗米五百石土宜六十石又以漕運總督

管理糧船是其專責

諭漕督於漕運過淮及回空之時往來親催歲以為例二十六年定各衛所漕船每年見運之數成造十分之一其各省歲修每船給修費銀七兩五錢至運軍不親押運以子弟代行向例運軍及代運人均發邊衛充軍至是並嚴該管官處分又定漕船受兌離次各省巡撫題報期限不得過二月逾限者論三十三年申嚴折徵漕糧耗米之禁又定僉軍

額例先是漕船運軍每船十名至十一二名不等
康熙二十五年定額十名至三十五年更定每船
僉軍一名其餘水手九名擇諳習撐駕者雇充三
十七年江南建平縣漕糧改折私米從民便也四
十三年浙江運白漕船亦定為五年更換四十九
年定掛欠漕糧漕司各官分賠之例尋定僉副軍
一人隨運凡重運到淮虧缺者令本軍駕運北上
留副軍買米趕幫如抵通欠糧留本軍完欠副軍

回空並令巡撫漕督給發漕船來往限單飭沿河
州縣挨注入境出境時日先是州縣交兌漕米取
米四升分盛二袋印封解倉場驗收至五十四年
令每船用米一石著糧道驗封到淮漕督拆驗加
封抵通倉場侍郎率糧廳驗明起卸其樣米仍作
正收

雍正元年

詔免江西脚耗等銀五十一萬兩米六十一萬石有奇嗣

後仍令按全書照數支給二年裁浙江船政同知其修
造漕船事宜併歸糧道管理又以漕船剥淺多有
擾害商船者

諭督撫示禁漕督失察者論並嚴漕船包攬貨物及夾帶
私鹽私藏火器之禁至經紀運米到大通橋車戶
運米進倉舊例每米五十袋抽掣一袋一袋少餘
袋例算於各役腳價內扣賠是年更定掣欠之例
每石秬米作價銀七錢秠米六錢仍准於腳價內

扣抵惟欠數多者照盜賣漕糧例治罪五年定催
漕船按汛成造每船給銀三十七兩六錢三分三
釐每歲給小修銀二兩十年期滿照例別造六年
特旨諭文學生員准免僉運又

諭浙江徵收漕米但擇乾圓潔淨不必較論米色准令紅
白兼收私粳並納著為令七年

上諭漕船過淮抵通所費陋規甚多各差御史二人前往
稽查不許該管官吏及經紀車戶人等額外需索以累

運軍先是漕船經過皂河濟寧臨清三處由河道總督題報時山東河南增設總河故以濟寧臨清歸河東總河題報九年

詔豁免江南江淮興武二衛鑽夫底料銀十萬八千一百餘兩又以山東河南多產黑豆令於額徵粟米內改徵黑豆十二萬石運供

京師十三年令漕運總督飭督運領運官嚴禁漕船水手擾害居民之弊

乾隆二年

特遣御史四人分駐淮安通州濟寧天津等處令各按所分之境巡察漕運諸弊又以江南浙江歲徵白糧恐致累民是年

諭裁減白糧十二萬石改徵漕米又將粟米改徵黑豆
河南二萬石山東四萬石三年

恩賞運弁銀人各四兩軍半之又改湖北通山當陽二縣漕米收徵折色例徵銀一兩二錢五分是年始

鑄鐵尺用積方之法覈算倉糧分頒戶部倉場及直省各倉並定各倉貯米每廩以萬石為率其奇零之數別貯一廩四年

諭漕運河道總督凡重運漕船所經過淺起剝即飭所在有司官具民船剝運其剝船雇直憑有司官酌給扣剝勒索者罪之七年復定山東漕船不必由漕運總督給發限單受兌之後即呈報河道總督及巡漕御史稽察催行又以浙江運白不願更換仍依

舊例撥定運船永遠承運免江西南昌江南興武
浙江紹興各幫貸通銀四千六百四十兩八年以
江淮興武二衛運軍有竄入黃快船避僉者俱令
歸入民賦每五年將現運及備僉餘軍勾考一次
又定河南粟米改徵黑豆二萬九千三百五十六
石六升有奇先是順治初以漕船至天津起剥分
運至通設紅剥船六百隻每船給田四十頃養贍
免其徵科至康熙三十九年裁革紅剥船按原給

田所收租稅額分派各省於漕糧項內分給運軍
雇船剥淺乾隆二年定每船給紅剥銀二兩至十
一年北河增設袋船六十號祿夫百八十名淺夫
三百名隨時疏濬以免丁累其置造袋船器具夫
工等費於紅剥銀內動支餘銀仍照數分給運軍
以備剥淺之用十六年又增改河南粟米徵收黑
豆二萬石又改江南運白漕船五年更換之例為
三年十七年定稽察各倉官除都統御史在城理

訟之期均更番到倉稽察並增定京通各倉差御
史一人稽察年終更代其各倉收漕滿厥倉場侍
郎封固御史加封各厥鎖匙交倉場衙門收貯二
十七年更定京通各倉滿漢監督期滿更代之例
仍以三年為準二十九年

諭司漕各員不得濫收潮潤米色是年漕運總督楊錫
紱請懲軍籍紳官富戶規避倉丁詭捏脫漏之積
習以裨漕務從之三十三年以兵部尚書託庸等

議停五年盤驗之法以省糜費先是直省倉庾建於各州縣城內其收兌稽察州縣自監之四十年定州縣不通水道者建倉於鄰邑水次以便起運四十七年定載運河管泉各員巡勘章程凡每年春夏之交令其親往泉源處所請夫疏導並飭各本管府州縣實力巡查分別勸懲是年奉

諭旨向來南糧餘米俱准在通變賣以資日用現在各省糧艘陸續抵通旗丁於兌足正供之外其所有多

餘米石情願出售者仍著加恩准其就近於通州糶
賣於市價民食均有裨益四十八年

上諭本年運河應挑各工比常較多自應分頭攢辦以
期明春一律早竣

皇朝通志卷九十四

欽定四庫全書

皇朝通志卷九十五

食貨畧

十五

水利

臣等謹按治水之法代無良策惟我

朝講求盡利凡可以施疏濬決排之力者無不先事
豫籌俾無泛溢而其最巨者則河工海塘自

定鼎以來

列聖相承無時不以瀕海濱江之民為慮建坊設壩疏滯
導流所費帑金千百餘萬其所以為小民保田廬
謀奠安者計至周矣迄今河流翕順海水晏安巨
浸之區安瀾永慶凡相度機宜啟閉䟽築悉稟

皇上聖謨經畫盡善茲纂通志於直省水利類為一卷
而於海塘河工別為一卷以見我

朝治水之政焉

順治九年

特遣官修理

畿輔石景山以南蘆溝橋一帶堤岸時蘇州松江嘉興湖州等處下游海口壅淤河道工科給事中胡之俊請浚吳淞以洩陳澱之水浚劉家河以洩巴陽之水

上從其言並令經理東南水利十七年改築江南當塗高淳二縣廢圩更名忠惠圩令有司不時培護

康熙二年近京夏潦

上遣官察勘令經理修隄挑淺事宜於是發帑修築蘆溝
橋及霸州等處衝決隄岸十年濬江南吳江長橋
一帶以洩太湖水勢十二年修河南安陽縣之萬
金渠引洹水溉田又以江南水患濬常熟之白茆
港武進之孟瀆河及淮陽之車路串場白駒丁溪
草堰場等處河口二十七年修雲南松華壩及金
汁等六河牌壩引水資昆明各縣灌溉時山東洙
水及小清河頻年漫溢沂川郟城新城高苑諸州

縣多被水患于是修復郟城禹王臺舊址遏沫水使復故道築青沙泊南堤疏濬孝婦河俾小清河會大清河入海三十六年

諭漕河督臣會勘下河積水作何歸海洩出民田之處一具題漕運總督桑格因請修芒稻河分高邵兩湖之水入江挑曹家灣湯家絆七節橋通高邵兩湖淤塞達芒稻河以入江挑車兒埠之溜子河使高泰所屬積水由苦水洋以入海挑澗河分運河之水

入澗由射陽湖以入海挑海陵溪使高郵所受之
水通岡門以入海挑車路白塗海溝三河使興化
所受之水由丁溪草堰白駒湖以入海挑蝦鬚二
溝戛梁河并朦朧河西淤塞之射陽湖使高寶興
泰鹽山等處之水由廟壩以入海又經河道總督
張鵬翮議因定挑蝦鬚二溝淤塞之處四十餘里
挑鮑家莊至白駒閘地高水湧之處八十餘里挑
撈魚港淤塞之處八十餘里挑老河口淤塞之處

三里有餘挑溜子河三十餘里由是下河積水悉由各口入海民田涸出時直隸霸州新安等處渾河泛濫旗民莊田被淹

命原任河道總督于成龍河督王新命察勘隨遣旗下壯丁備器械給以銀米挑濬分疏越三年歲事並大修

畿輔各州縣清河子牙河官堤民堤共千五百二十餘丈又以山東東平州一帶被水疏濬戴村壩淤

塞舊河築和尚林越隄四十六年

上以江浙蘇杭等府州縣或近太湖或通潮汐年久不無

衝刷

諭工部行文該督撫所有河渠水口度田建閘以時啟閉
其支港淤淺者亦宜即行疏濬建閘以資灌溉四十八
年濬甘肅寧夏宗澄堡李洋堡二渠引黃水溉田
造木石牯壩三處因時蓄洩又修築江西臨江府
北土橋老隄以衛清江豐城高安三縣田廬修築

湖南常德府大園隄令地方官專管五十年廣東
海康遂溪二縣建築圍隄以衛洋田

雍正二年

詔修畿輔石景山渾河隄工又濬浙江西湖先是浙江杭
州城內設筧鑿溝引西湖之水入城復由桃花港
響水閘會流于城外上下兩塘河溉錢塘仁和海
寧民田數萬頃時西湖間地多被民人占為田蕩
水道阻遏議請清出歸湖開濬以復故址其桃花

港一帶相其淺深酌量疏通三年濬山東小鹽河
及膠萊新河以資民田四年

上以畿輔水利最關緊要

特命怡親王允祥大學士朱軾察勘酌議尋議直隸之水

經流有三北為白河

即北運河

南為衛河

即南運河

滙

畿輔西南六十餘河之水為巨浸東至直沽合白衛
河同入海者為淀河淀之下流南來者為子牙河
北來者為永定河皆水濁泥淤為淀河患請於永

定河范壅口別開長定河一道引渾河遶王慶地
東北入三角淀直趨而東俾濁水無復淤淀子牙
河上承滹漳溢陽大陸諸水水沉泥多請將兩岸
之隄加高培厚束其流使由大城王家口入淀藉
淀河清流之力刷之不致泥沙淤淀其週淀迴環
千里者曰

欽隄自康熙三十七年修築之後日就圯壞請於清苑
文安一帶低薄殘缺之處悉為修治補葺建牖設

壩又開張家嘴勝芳河以瀉其流苑家中亭河
十望河以洩其漲開柴火淀口頭村引河以緩其
勢掘張青口毛兒灣等處以分其流使

欽隄鞏固河流順軌得

旨議行尋又濬霸州之芥牛河新安之漕電河高陽之豬
龍河京南之滹沱河以及渠口淀泊無不次第經
理即

諭設營田水利府以怡親王等董其事於是于灤州玉田

諸州縣濬流築圩建閘開渠招民人願耕者官給
工本並募江浙老農導之耕種及濬水節水引水
戽水之法會秋熟時田之獲稔者已百五十頃而
民間自行播種者七百餘頃乃分立營田四局曰
京東局京西局京南局天津局局各有長有副有
効力委員並責成地方官以時達之營田府後又
設營田觀察使二員副使二員所有田園渠堰時
加修理是年開濬河南百泉東西民渠及洹河石

橋西三十三洞灌田又開濬小丹河河口及秦渠
董下渠灌田五年

諭修天津教場老君堂渠橫口單街四處隄口又開東省
安山湖支河六道並於六隄口建牖以利節宣

命副都統李淑德原任山東巡撫陳世倌巡撫陳時夏總
河齊蘇勒總督孔毓珣踏勘江浙附近大湖及通
江潮之處概行築濬

諭太湖之水歸海劉白二河為要必逕直深廣方能順下

暢流其潮沙堙塞之處居民占耕日久亦當盡去新漲地畝以復故道李淑德等奏言蘇州松江常州鎮江水道並藉太湖為吐納西北承宜興荆溪百瀆之水西南承杭湖苕霅諸山溪之水而皆由婁江吳淞江黃浦江以入海是三江實太湖之尾閭疏其下流自不至泛溢請行挑吳淞江白茆河孟瀆德勝九曲河從之又議修揚州五塘以溉民田又以陝西鄭渠白渠龍洞三處民田向引涇水灌溉年久

漸致淤塞

命督臣岳鍾琪疏浚建閘以垂永久七年

命疏濬山東濟寧嘉祥及江南徐沛等州縣水道改陝西

西安府管糧通判為水利通判經理涇陽醴泉三
原高陵臨潼等五縣隄渠修濬事宜

上以寧夏為甘肅要地渠工乃水利攸關

特遣侍郎通智等董飭該地官屬大修渠道於是于察罕

托輝地方開鑿大渠二百七十餘里建進水閘一

座退水閘三座尾閘一座大支渠百餘道小陡口
百餘道又建大石閘洞一座通漢唐二渠之出水
渠東築長隄三百餘里以障黃河之旁溢渠西濬
西河三百五十餘里以洩漢唐二渠其大渠餘水
灌溉新渠寶豐寧夏平羅各縣民田又開濬六羊
渠百十有餘里建進水石牐一座退水石牐二座
鼓水大小牐三座開大支渠二十餘道小陡口百
餘道牐房俱設水手以司啟閉渠成

上賜大渠名曰惠農改六羊渠名曰潤昌又以大清漢唐
三渠歷久淤塞八年

命通智會同太常寺卿史在甲動工修補三渠越二年工
竣修葺廣西臨桂縣黃泥等十三陡鑿石九處增鑿
魚等二十陡鑿石百三十五處開鑿雒容縣陸路
又修興安全州一帶河道舊陡三十六處以資
轉運米穀灌溉田畝又改江西柘湖下洋二圩別
築大岸更名下洋西隄二圩九年

上以楚省洞庭湖綿亘八百餘里橫無涯際舟行遇風無地停泊舵杆洲居湖之中建築石臺於商船實有

裨益

特諭將營田水利捐納項內平餘銀二十萬兩解送楚省交該督撫經理建石臺於湖西之舵杆洲東西長九十六丈濶三十丈南北各灣進如偃月形以便泊舟自是商船無風濤患是年議准山西太原平陽汾州三府同知兼管水利其大同等府所屬渠道仍

責令地方官兼理十年增設雲南昆陽州水利同
知一人駐劄海口修阿迷州八達以通粵河濬嵩
明州河口以通舟楫開昭通府城濠以資灌溉是
年直隸修玉田豐潤及馬營林南倉宋家口一帶
圍堰廣東修遂溪縣辛壬丁三字號堤岸及麻烈
等牯江南修范公大堤江西修豐城土隄四川修
新津華陽二縣之通濟堰湖南修益陽沅江之東
西堰甘肅於瓜州疏勒河安家窩及口外柳林湖

地建堤築閘陝西於柔遠堡鎮夷堡中衛縣白馬
寺灘及口外雙樹墩開渠引水十三年於福建建
寧府浦城福州府古田開鑿火燒等四十三灘平
治相公等八灘柳林等六灘立柱指迷七里等八
灘設船救濟

乾隆元年

諭管理水利河臣及濱河州縣各視所屬境內凡有河
流淺阻即定章程每歲募夫修浚三年

上以直隸河道水利關係重大

特遣大臣詳勘開濬修築於是於蘆溝橋濬引河一道
麻峪村增築小堰三十餘丈又以東西兩淀為

畿輔衆水之匯設法疏通其清河堤岸週迴於順天
保定河間三府之境者則築培高厚以防潰決名
曰千里長堤時河南葉縣襄城等處被水患令寓
賑於工培築沙河洪河賈魯等河隄堰又搶修廣
東海康井鬼等七字堤柳字下牖遂溪甲乙等十

隄乙字牘並丁戊兩字麻烈大牘又加築甘肅寧
夏河忠堡長堤三千餘丈開濬陝西長安蓋屋渠
工千二百餘丈三年兩江總督那蘇圖請

簡差在京熟諳水利大員浚江南河道乃

遣大理寺汪濬總理通政司德爾敏協辦疏山陽阜寧
之漁清河興化縣之白駒閘下引河高郵州之道
湖橋馬飲塘河江都之灣頭河通州分司所屬之
十鹽場河通州之黃河洋范公堤及鹽城之新興

場河阜寧之廟灣場河是年又修築湖北漢陽黃陂縣之溪岸河堰及福建連江侯官長樂等縣之隄堰牯壩閩縣之海堰仙岐之塘岸以利農田尋開修黔省都勻府水道由舊施秉通清水江至湖南黔陽縣直達常德又由獨山州三脚里達來牛古州抵粵東河道緯路一概修治以資輓運四年諭直隸總督於水落之際經理消除積水事宜於是疏引永定子牙南運北運四河及東西兩淀以治其

經加築鹹水沽茶棚壘道作為遙堤迴障天津積
水開堰賀家口之小河何家園雙港之舊河溝分
洩藍田郭家泊積水以治其委又於藥王廟王家
莊韓家莊巨葛莊等處別開引河一道俾窪水同
歸於海自是直隸之水經流支流咸歸底定時豫
省大雨如注川澤交盈開封等屬被水者多

上命於杞縣拓城淮寧鹿邑之永利溝老黃河舊河故
道一概疏通賈魯河新河入淮之水令濬洩入渦

其乾河涯乃汴河故道亦開通導入沙河以消省
城積水並建砌軌溝石橋石牯以資保障五年

命廷臣會議淮揚九屬水利事宜汪濇言淮揚下河水
害有二最甚者開放高郵三壩次則東邊易進鹹
水於是平撤高郵三壩及昭關子嬰二壩以殺水
勢另添石牯三座以資灌溉其鹹水易進之處拆
修白駒三閘建天妃口石閘一座又移上岡北草
堰二閘於串場河口外以避鹹水倒灌再於淮揚

各屬東塘河道加築范公隄以及拼茶斜角二場
隄工落低揚子橋閘底三尺閘內金門收小俾一
概疏通以資蓄洩其九屬田畝之毗近河渠者於
兩岸修築田圩以作隄防時江寧布政使晏斯盛
疏請修鳳陽潁州滁州泗州四屬水利

上命汪漉德爾敏會同督撫詳勘定議尋議定肥城之
金斗河越河虹縣之枯河頭亳州之乾溪溝和州
之太洋河姥下河牛屯河舍山之銅城閘河來安

之龍尾壩河及各州縣陂塘溝渠圩埂土壩共六十二所均飭地方官勸導居民次第興行又淮河南巡撫尹會一請浚賈魯河並江南渦河南岸入淮之漳河時江西豐邑沿江一帶土石各堤險要令南昌府同知於秋伏汛發時即赴豐城防護隄工又福建龍溪墨場堡被衝堤壩令修補加增以衛田廬七年江水漲溢

命直隸總督高斌往賑

命大學士陳世倌會同高斌經理疏濬事宜尋疏言高
郵寶應諸湖承洪澤之下流自邵伯以上入海自
邵伯以下入江而入海不如入江之便請於金灣
滾壩下添壩二座分引湖水入鹽河即於鹽河對
岸挑引河一道並挑鳳凰橋下引河及壁虎橋下
庾家溝歸石草河以達江挑深董家溝使自為一
河直注於江

按董家溝原歸芒稻河

又修板浦以下場河及

六里車軸等河加築六塘河西岸民堰於五丈義

澤六里河頭各建石牖以時減洩使黃河北岸之水不至泛溢鳳泗之水澮沱灘為大而沱河淤塞為患因導宿州之水入澮導鳳靈之水入灘不使復入沱河海州之水沂沭為大將河身淤塞者濬深民堰殘缺者堅築其餘七府州屬支河溝渠修理者百四十餘處八年以高斌請於直隸之桑乾河南北兩岸開大渠一道引水以溉民田九年修理清江下游河道自泰州鹽河及高寶二湖相連

之華家灘大新河高邵二湖相連之王家港邵伯
通運之引河一律疏濬俾循次灌注為湖河遞減
之法其鹽城以南二串場河白駒閘下引河並洩
水之蚌沿梓新車路白途海溝興鹽界河東西官
河一律疏濬以資利導其范公隄各閘多添金門
會合引河以廣出水之路又疏濬通州境內任家
港等處以備宣洩是年

諭尚書劉於義往保定會同總督高斌疏濬河間天津

二府河渠淀泊十年

上以海沫一帶連年被水

親詢安慶巡撫陳大受大受言海州之水下苦於鹽河
之南北橫截使六塘南北之水不得東流上苦於
沫河之水盡由沫陽海州入海宣洩不及以致為
害於是

命尹繼善白鍾山興修明年尹繼善等議定濬濰河南
北兩岸其洪溝等處河道建設涵洞潁州之肥河

宋湯河蒙城之芟河北淝河堰淺築堦建設橋梁
以分洩沫河之源下江六塘河至沫陽分南北兩
股入鹽河歸海乃接築南北塘河子堰建設涵洞
並疏諸處港河至山陽之吉家橋鹽城之九曲河
阜寧之橫溝河清江之民便河史家蕩古河安東
之尤家蕩河海州之薔薇河桃源之劉老澗積水
河一律挑濬築堰立閘其鹽河下之武障義澤六
里三河口各設滾水石壩贛榆之三公河圍子河

疏去淤滯以洩盛漲大沙河旁築子堰以資捍禦
於是鹽河無橫截之弊工竣立修濬章程凡各處
長隄巨川大橋大閘歸於歲修官為經理其支河
小港民堰路溝分隸廳汛州縣各經管所屬督勸
居民以時修整是年疏山西牛站之濠渠河南惠
濟之口門甘省秦州之雙橋又濬浙江西湖之湖
心亭放生池甘省皋蘭之大通河張達州雲南恩
安之李子灣魚口河以及陝西涇陽之龍洞渠福

建長樂之蓮花塘以資水利十二年加築江南沫
河堰工疏濬宿遷桃源境內兜灣河建駱馬湖尾
閘永濟橋四十丈開濬上下引河以助分洩添建
甘泉縣東西二灣滾水石壩築范公隄千百餘丈
修江西九江府石礪吉水縣被衝隄岸浙江仁和
青龍田家井二涵洞又以楚南洞庭為川黔粵楚
諸水滙宿之區必使湖面廣濶方足容納禁濱湖
荒地毋許築堤開種是年淮水溢山東巡撫阿里

奏請濬沂蘭等河以殺上流之勢

命大學士高斌董其事明年山東沂邳盛漲建瓴而下
注駱馬湖衝決六塘河兩岸子堰滙歸海沫

上諭左都御史劉統勳馳往會同高斌及阿里衮詳勘
淮安海州被水之田延及鄰省之處隨時興作於是
斌等請將德州哨馬營滾水壩落低以消漳衛之
盛漲海豐之馬頰河聊城之徒駭河疏導以分運
河之漲東平之戴村二壩落低以減運河漲溢之

水濟寧之董家口引入白馬河歸湖濟運以衛民
田沂州之江楓口堅築隄壩使入湖歸運以免旁
溢從之十六年

上巡幸江浙見蕭山會稽一帶河道淺窄舟楫難行
命河臣於當䟽濬修築者次第興工以垂永久是年又
准大學士傅恒請於

畿輔高梁橋迤西營治水田十八年黃淮衝決高郵
寶應靈璧等處被淹

命舒赫德劉統勳等董率堵築以資捍禦二十一年荆
山橋淤淺黃流四溢而駱馬湖隄亦復殘缺

命濬荆山橋下河身以消山東滕嶧等縣積水二十二
年築駱馬湖隄以禦運河盛漲時山東金鄉魚臺
等屬及上江之宿虹靈璧河南之永城夏邑等處
河流漫衍

命侍郎裘日修等察勘各屬積水將河南虞城夏邑等
處支幹各河及江南宿州之濉河山東兗州之府

河洸河一律疏濬二十四年濬山東曹單二縣與
江南豐沛二縣之順隄河及河東之衛河泉源又
開常熟昭文二縣之白茆河徐六涇海口及塘外
淤河以消積水二十五年改常熟昭文二縣海口
石閘為滾壩於南關車邏等壩封土三尺以資宣
洩二十六年准直隸總督方觀承請於易州泉原
村開渠建壩以資灌溉至二十八年渠成

賜名安河是年開泰州丁溪小海二閘引河匯全家港

歸海開阜寧鹽城二縣之上岡草堰陳家冲三閘
引河匯入射陽湖歸海又濬常熟之福山塘河灌
溉民田千萬餘頃時河流下趨賈魯懷慶府屬被
淹乃築賈魯河奪溜急處并添修懷慶城外月隄
以資捍禦二十七年閩浙總督楊廷璋請濬烏程
長興二縣縷港江西巡撫湯聘請於南昌縣之富
倉圩改建石閘直隸總督方觀承請修理

畿輔河渠隄堰以工代賑二十八年方觀承又請濬

鳳河上游自南宮以上至閘子口百二十餘里以
工代賑俱從之

特命兆惠會同長蘆鹽政天津知府於海河修壩酌定
水利以時蓄洩是年浚松江太倉等屬水道挑荆
山橋舊河三十年濬武進丹陽之孟瀆等河三十
二年

上幸天津親履淀河隄閘

命築新堤一道自長隄之三里灘至莊兒頭止上下銜

接約十餘里衛村民三千戶得膏腴地數千頃時
湖北黃梅隄潰

詔自董家口至江西德化境內圍隄通行堅築三十六
年永定河暨北運河溢

遣大臣會同督臣經理於蘆溝橋迤下六工凡漲灣曲
處一律濬直其南岸之求賢橋俱改灰工忙牛河
六工以下順導東行並築土埝以遏北徙於北運
河東岸南倉上新築橫隄以衛北倉村莊再建橋

座以洩西來之水又疏兩減河及東岸引河培築
隔淀河及千里長隄時以尚書裘曰修董其事歲
事時曰修請

飭地方官於一切淀泊禁民報墾讓地與水並禁橫加
隄埵

上諭直省凡有此等瀕水地畝着有司嚴禁佔耕毋使
與水爭地四十五年改建高家堰三堡六堡甃石加
築徐州舊石堤九百餘丈其韓家莊金山一帶隄

堰均改築石隄四十六年邳睢儀封等處隄潰浸
逼運河

諭河臣將曲家隄及魏家莊大隄堵築於蘭陽商邱等
堡添建大隄一道內開引渠百餘里展寬潘家屯
六塘河等處挑微山湖下顧家莊等引渠以洩積
水四十八年又新建青龍岡迤上長隄引河達河
流直注商邱時又因蘆溝橋下淤沙過甚

特命金簡會同劉莪查勘並令依中泓五孔口面全行

相連挑挖俾上下游一律寬深河流暢達水無沙
淤滯蓄之患四十九年江西巡撫伊星阿奏南昌
新建鄱陽餘干建昌等六縣下游地接鄱湖又當
章貢諸水之衝圩堤沖塌田禾被淹請借項修築
下部議行五十年大學士阿桂奏接奉

上諭前因桐栢山為淮水發源特諭畢沅詳晰查勘支
流或有淤塞即應設法籌辦茲據畢沅覆奏該處發
源之地河身不甚寬廣易於疏浚倘有需開挖之處

即勘明興工又賈魯惠濟兩河即係淮水支河現在
一律疏濬江南洪澤湖向藉淮水挹注今淮水發源
之處經畢沅勘明疏濬將支小河一律浚導該處賈
魯惠濟二河其小流歸并渦河入淮現在亦加疏浚
俾就通暢并於淮瀆廟虔申祭告自當仰邀

靈佑泉源湧發衆水會歸下游湖水日就充足以助清
敵黃伏查淮河清水禦黃濟運為全河最要關鍵今

歲淮水未經大長仰蒙

聖明遠照以桐栢山為淮水發源

諭令畢沅廣為濬導從此會流下注洪湖自必日就充
足暢出清口永資利賴雲南巡撫劉秉恬奏請興
修劍川州劍湖水利並挑挖昆陽州海口工程部
議從之

皇朝通志卷九十五

欽定四庫全書

皇朝通志卷九十六

食貨畧十六

河工

順治元年

特設河道總督一人駐劄濟寧州

後移駐清江浦

總理黃運兩河

事務設分司駐劄各境定分汛防守之法每遇桃汛伏汛秋汛將臨令該管官弁加謹分防二年考

城之流通口決旋即堵塞八年築祥符單家寨堤
封邱李七寨堤又築陳橋堤鄭家莊堤九年河決
封邱大王廟口水從長垣趨東昌壞安平堤北入
海因於丁家寨鑿渠引河殺其勢築祥符時和驛
堤又築常家寨隄及高邱王家壩堤考城王家道
口堤十年定南旺臨清等處煞壩濬淺每年一小
濬三年一大濬十一年築陽武慕家樓高邱夏家
樓虞城土樓諸堤十二年築祥符守么寨及回龍

廟月堤陳橋堤並築蘭陽板廠陽武潭口寺包家
廠諸堤十四年築祥符之槐疔痘清河集並陳留
之孟家埠諸堤是年陳留孟家埠口決於堤南築
縷月堤五百丈並濬引河一道以分水勢十六年
總河朱之錫疏言兩河利害條奏十事一陳明南
河夫役一酌定淮工夫役一查議通惠河工一特
議建設柳圍一嚴剔河工弊端一釐覈曠盡銀兩
一慎重河工職守一申明河官專責一申明激勸

大典一酌議撥補夫食疏入從之

康熙二年准朱之錫請定河差滿漢官仍照舊例

三年更換

按三年一換之例係順治十四年河臣楊方興奏定嗣因六部司官輪流陞轉

又兼滿漢並差議將管河分司改為一年更替之例

七年築祥符一覽臺聳

家寨及儀封石家樓小宋集諸堤九年河水盛漲

自桃源界起東至龍王廟俱因舊址加築高濶十

五年高家堰及漕堤等處潰決

特遣尚書龔如錫前往察勘悉心籌辦於是開白洋清河

以東引水河使黃河入海開清河兩旁引水河使
淮水出河又築河岸遙堤縷堤修高堰堵翟壩而
揚境以內各工亦同時並舉是年裁高郵分司及
南河工部又准總河靳輔請挑山清高寶四州縣
運河並清口爛泥淺引河四道及清口以下至雲
梯關河一道十七年

命撤回南北中河三分司其河道工程委該地方監司府
佐貳管理又定河工頂衝之地即以舊堤為縷堤

於舊堤之外別築遙堤以為重門保障又准靳輔請自翟壩至周橋二十五里湖陂築大堤一道自桃源東界至石人溝築縷堤一道又自龍王廟至四舖溝接築四千九百三十八丈十八年建宿遷之朱家堂溫州廟桃源之古城清河之王家營安東之茆良口減水壩共六座二十三年

上南巡閱視河工

諭朕觀高家堰地勢高於寶應高郵諸水數倍前人於此

作石堤障水實為淮揚屏蔽且使洪澤湖與淮水併力
敵黃衝刷淤沙關係最重仍須歲歲防護又

諭運道之患在黃河禦河全憑隄岸若南北兩隄修築堅

固則河水不致四潰水不四潰則濬滌淤墊沙去河深
隄岸益可無慮今隄防雖經整理還宜隨時修築以防
未然於是於高家堰舊口周家橋翟壩及蕭家渡九里

岡崔家鎮七里溝黃家嘴新莊一帶緊要近溜之
處所築長壩與逼水壩均每歲加築高厚二十四

年靳輔疏言徐州鳳陽淮安所屬十九州縣沿近黃河南北兩岸頻受水患請共築束水隄三十萬丈隨地高低牽築頂高二丈底寬六丈八尺以資保護從之三十二年戶部侍郎博濟疏言黃河南岸之楊橫莊烟墩馬邏及北岸之朱家莊便益門東安門六險工向無月堤且所下之埽亦俱單薄應請築堤培埽以資鞏固從之三十八年

上巡幸江浙審視清口高家堰地方見洪澤湖水較黃河

甚低河水逆流入湖以致泛溢於興化鹽城諸州縣
諭總河於射陽湖淤墊處分委効力人員并力開濬其黃
淮交匯之口令於黃河南岸近淮之堤更迤東長
二三里築令堅固淮水近河之隄亦迤東灣曲拓
築使斜行會流毋使黃水倒灌又以河通則流自
急流急則沙自刷而河自深令於清口西數灣曲
處試行濬直直濬有益漸將上流曲處一律直濬
尋經漕運總督桑格河道總督張鵬翮等議定挑

濬蝦鬚二溝及鮑家莊滔子河撈魚港老河口等處三百餘里引積水流歸海四十三年疏濬戴村壩淤塞舊河築和尚林月堤逼水仍歸故道以免東平州一帶水患四十七年疏濬蘇松常鎮所屬支河港蕩並修建新舊閘壩四十九年濬徐邳境內房亭等河

雍正四年堰濬濮州之魏河聊城之洩水河並開濬禹津趙牛等河五年疏濬濟南府屬之管

氏倪倫溫聰潔刁強等河又於東省安山湖
開濟支河六道并於六堤口建牐以利節宣
又定濱河居民架水板房有礙河道者坍塌之後
不許再行修造至濱河未報陞科之新漲地畝並
越砌石礎實繫妨礙河道之處皆令速毀違者罪
之該管官失於稽察分別議處六年議准吳淞天
妃七浦三牐各設牐官一人白茅徐六涇二牐共
設牐官一人又議准劉莊青龍橋改為石牐鮑宗

壩運鹽河建築土堤鹽城石疔口天妃口廖家口
草堰口如臯苴河洋黃河洋各增建石牖董家溝
徐家涵等處建設涵洞以資宣洩七年增築高家
堰堤閘通用石工八年議准串場河王道港新洋
港牛龍港草堰口廖家港五處積沙照吳淞白茅
等海口之例用犁船犁鬆用混江龍按時疏濬又
議准泰州興化縣東臺地方設立水利同知一人
統轄所屬串場河道九年議准戴村新壩拆低與

舊壩相等並將高岸改作漫坡以洩水通沙十年
議准如臯之岔河以北至豐利場二十八里岔河
以東至掘港場五十里各就淺深分段增濬俾蓄
水五尺以利運行十二年修補秦州屬之柝茶地
方舊隄移進三四里別築新隄如臯縣之豐利掘
港馬塘通州屬之石港西亭餘西餘中餘東呂四
及秦州屬之丁溪草堰興化縣屬白駒劉莊鹽城
縣屬之伍佑等場范隄並令鑲築防風

乾隆元年

諭治河之道必將全河形勢熟悉胸中黃河自河南武陟至江南安東入海長隄綿亘二千餘里舊設總河一人駐劄清江浦雍正七年復設河東總河誠慮鞭長不及故俾南北分隸各有責成惟是河流日久變遷舊險既去新險復生其間防浚事宜有病在上流而應於下流治之者有病在下流而應於上流治之者若河臣於南北形勢未能洞悉遇有開河築隄等

事或至各懷意見則上游下游必有受弊之處所關匪細徐州府當南北之衝為兩河關鍵最為緊要著將副總河移駐徐州凡兩河開築事宜令其就近與南北河臣公同酌議舉行其毛城舖等處減水牐壩仍令督率徐屬廳營按時啟閉五年

上以清口黃淮交匯係黃運湖河之樞紐定於風神廟前東壩及運口頭壩外各接長數十丈以資收束其運口頭壩之南接長挑水壩使其迴流入運六

年又定黃運兩河自宿遷至清河通築縷隄二萬
五千餘丈格隄九道十字河至九里岡通築縷隄
百餘丈格隄五道仍以運河南岸縷隄作黃河北
岸遙隄先是洪澤湖濱每遇風浪船多漂溺康熙
年間曾設救生樁全活甚衆十一年

諭夏家橋地方有舊蘆壩一座高堰迤西有順水壩一
座皆有口門為遭風船躲避之所著於高堰老隄頭
山盱高澗壩及徐家灣周橋增護隄救生壩四處又

以裏河運口為淮揚運河關鍵全賴口門收束

令頭二三壩口門毋許過四丈十六年

上南巡周覽河工

諭洪澤湖上承清淮汝潁諸水滙為巨浸所以保障者
惟高堰一堤天然壩乃其尾閘伏秋盛漲輒開此壩
洩之而下流諸縣胥被其害冬月清水勢弱不能刷
黃往往濁流倒灌在下游居民深以開壩為懼朕親
臨高堰循隄而南越三滾壩至蔣家廟周覽形勢乃

知天然壩斷不可開近者河臣又請於三滾壩外增
建石滾壩以資宣洩不知增三為五即以過水一二
尺言之向過三尺者即五尺向過六尺者增而至丈
是與天然壩名異實同亦當為之限制上年滾壩過
水三尺五寸天然壩仍未開放應即以是為準於是
於天然壩立石永禁開放其五壩以仁義禮智信
為次仁義禮三壩一如其舊智信二壩則於石面
之上加封浮土如仁義禮三壩已過水三尺五寸

不足減盛漲則啟智壩之土仍不減乃次及於信壩永著為例至高堰石隄南滾壩以南舊用土工石隄有首無尾亦令自新建信壩北雁翅以北一律改建石工十八年淮水盛漲洩洪澤五壩泛車邏南關二閘黃河復決銅山隄南注靈虹諸邑歸宿洪澤奪淮而下

特命舒赫德劉統勳往來董率堵築均於歲冬合龍尋又於高堰武家墩迤北築磚工隄堰十餘丈以資

捍禦又總督高恒疏稱海州沭陽地方逼近海濱地勢窪下為衆流之所趨請將下游入海道路再加疏浚於是挑濬高墟口湯家溝及義澤車軸五圖等河於鹽河場河大伊山洪河三汊口一帶並武障越河南股河尾修插幫堰以資蓄洩十九年疏山陽縣之澗河涇河寶應縣之子嬰河高郵州五里車邏三壩下之引河泰州丁溪插之古河二十年

諭上年江省被災各屬雖屢經撫恤猶恐將來青黃不接之時間閻餉口維艱現在下河及芒稻河等處有應行疏浚修築者可隨宜興舉為以工代賑之策於

是濬山陽縣之市河寶應縣之黃浦河築安東縣之平旺河子堰挑沛縣之茶城支河及邳睢屬峯山隴下之引河又暫借帑修築桃源清河二縣

六塘河兩岸堤堰

按舊例此河堤堰原係民修茲因災民無力興工故豫借帑銀

代修分作三年帶徵還項

二十一年黃河漫溢疏荆山橋河身

以洩滕嶧等縣積水二十二年

上兩度南巡親莅河干

指示一切疏洩捍禦機宜時微山昭陽諸湖俱已疏通而駱馬湖隄堰淺缺不足禦運河盛漲於是並築駱馬湖隄又以六塘河以下餘潦停積桃源宿遷諸窪地多成巨浸山東之金鄉魚臺等屬未涸地畝尚有十餘莊江南之宿遷靈璧及河南之永城夏邑等處漫行地界不下數百里經山東巡撫鶴

年奏報即

命鶴年赴荆山橋借白鍾山及侍郎夢麟籌濟寧金鄉
魚臺滕嶧五縣水勢隨

遣侍郎裘曰修馳視山東河南上江積水並

飭欽差河臣揀熟諳水利之員先其最要者舉行餘亦
次第並修統於歲內告成於是自濰城以東堅閉
毛城舖諸牖使不得洩黃壅灘於亳潁一帶及虞
城夏邑商邱永城各屬支河幹河一律疏濬以洩

中州諸水去路挑兗州之府河洸河改金口涵洞
為減水牐改楊家壩為石牐浚伊家河洩微山湖
入運又堵築沂水不使入運以免沛縣旁溢添設
昭關滾壩建高郵運河東堤石牐酌定水則以時
啟閉浚芒稻牐越河以闢湖河歸江尾閘於荆山
橋上一帶支河專派道員駐劄隨濶隨疏以暢下
游之勢是年築高堰添甃石隄嗣又築高堰北岸
土隄二十四年浚山東曹單二縣江南豐沛二縣

之順堤河與山東之衛河泉源以濟運二十五年
又開運河東堤金灣壩下引河改低董家溝廖家
溝石羊溝三壩又添築河南懷慶府城外月隄二
十六年督臣高晉疏言下河州縣境內支河汊港
及田間積水向俱滙入串場河北流於鹽城境內
諸牐歸海其閘下舊有歸海引河不可不加疏治
請將丁溪小海二牐引河疏浚並順勢再開一引
河滙入王家溝歸海又將上岡草堰陳家沖三牐

引河疏浚亦再開一引河滙入射陽湖歸海以分
洩水勢從之二十七年

上三度南巡

駐蹕蘓州

命劉統勳兆惠會同河臣詳勘湖河歸江之路尋議定

開擴新挑引河下游使有建瓴之勢折金灣中二

閘添建石牖三十丈落低西灣壩四尺於河頭加

挑深寬以資利導又

特示宣洩機宜令展拓清口十丈並建立水誌以垂永久又於徐州河堤自軌工止處接築甃石十七層為經久善後之計三十年

諭前因微山湖蓄水過多瀕湖窪地每致淹浸經崔應階等奏請宣洩微湖以水誌一丈為度於韓莊添建新閘以殺其勢並挑荆山橋以暢其流朕今歲南巡回鑾時舟行所經詢知窪地近多涸出農田耕作有資但湖水暢消亦恐艱於濟運今據楊錫紱奏稱湖

內之水須存一丈二尺用至五月八牘底水尚可得
四尺餘寸若止存一丈則五月間八牘底水止存二
尺六七寸重運難行請交東省河撫可否量改水誌
或將湖口以下數十里河底一律挑濬五尺等語所
奏於漕渠轉輸自有裨益但水誌改加二尺於低窪
地畝有無妨碍及挑深河底是否可行著崔應階會
同李宏詳悉確勘具奏期於漕運民田均得利賴尋
議定將滾壩內機心每孔安砌石槽設立板片水

小之年加板欄東其八牖河亦將新淤沙泥儘力挑佔至舊時河底而止三十四年挑東省運河一律深五尺計工五年而後止三十九年黃河老壩

口漫溢

遣大學士舒赫德赴江南會同高晉設法堵築旬月集事黃河大溜全由故道歸海四十一年

諭清口為湖河最要關鍵而陶莊之水逼河南流清水勢弱黃水勢強每有倒灌之虞康熙年間

聖祖親莅河干周覽形勢

命於清口迤西隔岸治陶莊引河導黃使北其南岸築挑水壩橫截河流過入陶莊河口時河臣經理未善隨濬隨淤乾隆四年命大臣閱視仍謂難行乃以木龍挑溜北趨不過聊為目前補救之計甚屬無裨著河臣薩載督臣高晉測量高下曲直繪圖貼說圖上

上用硃筆點記其處反復

指示於是復開陶莊引河不期年告成而新河順流安

軌直抵周家莊始會清東下旋又

命於新河頭下添石壩一道為重門保障由是清水常
勝黃水無倒灌之虞四十三年儀封考城漫口潰

決

遣大學士阿桂刑部尚書袁守侗前往察勘嗣據阿桂
等議定堅開金門展濶引河接築挑水壩遏溜北
趨合龍後又請修馬港河西岸殘隄接至北潮河
西岸民堰以禦倒灌從之四十五年

上五度南巡閱視高家堰隄牘

命總督薩載將三堡六堡等磚工一律改建甃石並加
高數尺其徐州舊有石隄九百七十餘丈較新築
石隄短少三層亦令一律加高自韓家莊至奎山
一帶隄堰四百五十餘丈一律改築石隄直接山
脚以垂鞏固四十六年邳睢南岸之魏家莊大隄
潰隨

飭河臣襄護漫口預防北岸河隄然後籌計經久良策

未幾北岸曲家隄亦漫浸逼運河

上以黃水經過河湖下游無不淤墊之理

諭河臣急赴運河籌辦分洩事宜確勘微山湖水淺深
尺丈迅速堵築時大學士阿桂奉

命查勘海塘工程即令董理河務尋經阿桂疏奏於東
西兩壩下埽追壓堅實壩臺增加高厚金門斷流
大溜全歸引河引河中泓流行迅駛直注六塘河
歸海四十七年南北兩處漫口合龍後陡墊三十

餘文隨

諭阿桂等於上游南岸改築壩工俾得吸溜歸槽并

令薩載展寬下游潘家屯六塘等處去路挑微山湖

下顧家莊等引渠阿桂等勘定上游自蘭陽三堡

至商邱七堡南隄外添建大隄一道內開引渠一

百六十餘里導河水入渠下注商邱歸入正河故

道入海四十九年河撫李奉翰疏言邳睢廳黃河

南岸瓦房迤上張家莊地方因黃水盛漲大溜趨

逼塌去外灘應趕下大埽簽釘長椿加廂追壓從
之又挑挖荆山橋及蘇家山壩引河五十年以天
然閘下引河年久淤塞自黃河岸起至韓家莊挑
河築堰又李奉翰疏言裏河廳頭壩外堦水壩乃
重門收束堦攔湖水多入運口以濟重運應請建
築壩工從之河南巡撫畢沅疏言賈魯會濟諸河
久經淤塞應請及時開濬且於水旱不時可資蓄
洩從之

海塘

順治元年禮科給事中張惟赤疏請歲修海塘以防潮患於是修錢塘縣石塘二十一丈二年增修

六十丈

按海塘自前明崇禎二年同知劉元瀚建修海寧捍海塘後不復修

康熙三年海決修海寧縣塘築石堤並築尖山石堤五千餘丈九年設浙江海防同知二人專司塘務三十八年修錢塘江塘四十年修錢塘江岸築石塘每塘一丈用石一縱一橫固以油灰鎔鐵錠

鑲嵌石縫深根堅杵加築子塘以為重障共建石塘六百六十七丈子塘八百九十五丈四十一年江塘圯布政使郎廷極築之建潮神祠於上五十年重築江塘布政使殷志熙董築其法用石一縱一橫每層鑿孔以巨木貫之每五六石聯為一石又於橫直合縫處用鐵錠鑲嵌成塘二十丈五十七年修築海寧石塘濬備塘河巡撫朱軾建築其法每塘丈用木櫃二每櫃貯石塊五十斤為塘基

外築坦水復開備塘河建牖一座五十九年從巡撫朱軾請於老鹽倉築魚鱗石塘開濬中小鹽淤沙令海防同知專督歲修是年分修海寧塘六十年改築草塘

雍正元年以赭山海口壅塞逼近塘口

諭該督撫即行疏通毋使潮汛留沙漫壅以固海寧塘根
二年

命吏部尚書朱軾會同江浙督撫議興海塘事宜尋議浙

江海塘自餘姚縣之澣山鎮至臨山衛土塘三道
內有一道為老塘年久沙淤百姓佔耕築土塘二
道形勢卑弱應加高厚自上虞縣之烏盆村至會
稽縣瀝海所石塘暨兩頭土塘漸致坍塌應於塘
底填築亂石上鋪大石貼石築土以資培護自海
寧縣之陳文港至尖山亂石砌邊土塘加築高厚
其塘如式改修塘外亂石子塘重修完固其原無
子塘者如式添建海鹽縣自秦駐山三澗寨至演

武場石塘衝塌百五十餘丈應如式修築議得松江海塘自金山衛城北至華家角滌闕墩至東灣金山墩至西墩兵厰至張家舍倪家路至三分墩周公墩至華家角各土塘計二百五十餘里內有最險工一段次險工二段俱應改土為石其餘水勢稍緩之處宜堅築土塘自華家角至上海之頭墩塘外淤沙之處與頭墩至嘉定縣界內外土塘二道俱令逕直加築塘外窰釘排樁以防衝潰俱

從之三年

命於塘內一概增建複塘以禦海嘯五年巡撫李衛請增

築浦兒飛草壩並改建姚家堰草塘從之

姚家堰
舊建土

堤

是年復修海寧縣錢家坂馬牧港等處塘工又

修江塘六年修海寧縣老鹽倉西塘縣南門外海

塘錢塘江塘七年

命建海神廟於海寧縣東門內又改建海寧縣荆煦廟等

處石塘

向係草塘後改
土塘今建石塘

築陳文港等處草壩八年

築寧西塘大壩設海防兵弁鑄鎮海鐵牛五座又
修仁和縣塘九年續修海寧錢塘塘工十年築仁
和沈家埠海寧華家衙草塘十一年

命內大臣海望查勘浙江海塘於海寧之尖山塌山中間
建石壩一道以堵截江溜又

諭於中小壩開濬引河以分水勢增設道員一同知一守
備二千總三把總七兵八百專司隨時修補又修
仁和錢塘平湖諸邑塘岸十二年濬南港河築尖

山西浮壩十三年總督程元章疏定海塘事宜四
一錢糧宜分案具領一分別保固年限一令承修
官會同估造一於緊要工所豫貯物料從之增築
魚鱗石塘葺浦兒堯舊塘加築海寧南門外魚鱗
石塘又定攻沙法大學士嵇曾筠疏言寧邑塘工
之患皆由南岸沙灘沙背挑溜致水勢全向北趨
請於南岸沙洲用鐵具梳挖陡岸俾河岸根脚空
虛海潮來往自為衝刷坍卸以洩水勢從之

乾隆元年建築仁和海寧魚鱗石塘六千餘丈并
海寧南門石塘設運石海船五十隻二年編石塘

草塘字號

向例各塘冊姓率以某家東西起北開
報易於朦混雍正年間監督汪澄張坦

麟等議將各塘編立字號至是大學士嵇曾筠咨
部將各塘照千文編號以二十丈為一號建覽界
碑仁和計編七十二號海寧編六百
四十號其餘海鹽等塘均照此例 改建海寧遠

城坦水四年停草塘歲修改建浦兜堯等處石工

續築尖山未竣壩工

前大學士嵇曾筠因水勢險
急難以堵塞疏請暫停蒞撫

臣盧焯以水勢已平
合龍甚易疏請補築

復濟備塘河興築仁和錢塘

江海塘埭五年續建東塘石工是年尖山水口成

乾隆二年經始

鑄鎮海鐵牛四座六年總督德沛復請老

鹽倉迤西至仁和縣之章家菴柴塘改建石工從

之

命左都御史劉統勳查勘浙江海塘

先是五年十一月德沛曾有是請部

議准行以劉統勳言改建不必過急乃緩興築至是復請故違統勳會勘

七年總督那

蘇圖疏言海寧縣之華家街柴塘外沙綿漲數里

無須改建石塘惟老鹽倉汎至東石塘界地俱頂

衝請擇其最險之觀音堂汎坐字號老鹽倉汎伏
字益字等號建築竹簾石壩是年左都御史劉統
勳疏言親履南北兩岸柴塘改建石塘誠經久之
圖請俟水緩沙停乘機興築每年以三百丈為率
督臣那蘇圖復疏言老鹽倉汎至東石塘界最險
請先間段排築石簾俟石簾根脚堅實再照原議
改建石塘均從之九年

命吏部尚書公訥親勘修浙江塘工尋疏稱仁寧二縣

柴塘外設沙寬廣不必改建石塘從之是年海寧

魚鱗大石塘工成

乾隆二
年經始

十二年濟中小壘工成

十三年增築護塘土堰又議增滾壩及塘汛弁兵

十五年海潮平

謹按海水自乙丑歲以來大溜直
趨中壘至是年海波不揚臣民慶

幸冬十二月撫臣永貴以
秋汎安瀾塘工穩固疏聞十六年

上巡幸江浙莅錢塘江

幸六和塔敬念

世宗憲皇帝奠安之德勒石紀事永示無極十八年海潮

平十九年督臣喀爾吉善請裁改海塘營官弁

江海

塘工尚設兵備道一員統率守備二員千總四員
把總八員外委十六員馬步兵千分守防護至是
以尖山石壩告成中小壘引河暢流塘工穩固裁
汰道員塘工歸杭嘉湖道專管其守備以下等官
兵弁均裁改留堡夫四百名三百名守北
岸一百名守南岸餘兵改歸杭乍二營

二十二

年

上巡閱海塘

幸觀潮樓

命建海神廟於城南明年廟成

御製碑文勒石二十四年酌復海塘營弁兵

復千總一
把總二外

委三馬兵二十步戰兵六十守兵三百名海
寧分設二汛舊設堡夫悉行裁汰統歸兵額

加築

護塘土堰

時撫臣莊有恭言海寧石塘近
城一帶護沙沖塌故有是築

增築層

石坦水修海寧條石坦水

時江流海潮復改
由北大壘出入

二十

五年修東西塘坦水及韓家池柴塘復修築海寧

南門外堵坦水

時海寧南門外及石門遠城塘外
二層坦水為五月望汛潮損故復

修

二十六年修胡家堦坦水

時潮水逼塘護沙全
刷地當頂衝故建之

修魚鱗石塘坦水

自雍正八年建後已歷
久今外無護沙故改建

修馬

收港塘工坦水築秧田廟坦水修韓家池柴塘

均

潮汎冲塌
護沙故修

二十七年

上巡幸浙江躬閱海塘咨度經久之計將老鹽倉柴塘
改建為石因下木椿試之奈沙質浮鬆所下之椿不
能牢固其柴塘向內數十丈雖可下椿又皆田廬
溝塍

上命仍築柴塘定歲修坦水以資擁護又改築四里橋
魚鱗石塘并華岳廟等處石塘盤頭坦水二十八

年改建念里亭諸處魚鱗石塘二十九年置老鹽倉護塘竹篾增築念里亭坦水三十年

命於海寧全城環遶石塘普築三層坦石並隨時修整以資防護四十五年

上五次南巡

親視海寧塘工以柴塘究不如石塘鞏固因

命該督撫督率所屬自海寧陳文港石塘迤上至老鹽倉柴塘四千餘丈通建魚鱗石工旋

欽定四庫全書

皇朝通志

卷九十六

二十六

遣大學士阿桂往來勘視工程四十七年據總督陳輝
祖奏西塘頭圍為江海交接之處漲沙十餘里橫
江截海阻隔水道致范公堤以東漸致搜刷章家
菴迤西沖擊灘塢因於頭圍沙灘開引河一道待
春夏山水暴注時開放引河借山水奔騰之勢順
流攻沙會春雨漲發大溜直趨引河范公堤正溜
開向南行漸有南坍北漲之勢四十八年原辦續
辦魚鱗工竣又奉

上諭浙江范公塘一帶看來竟須一律改建石塘以資捍衛昨已諭知富勒渾等矣明春南巡時朕親臨閱視指示機宜降旨後即可興工辦理至富勒渾有老土塘根脚同係淤沙土性浮鬆之語從前老鹽倉一帶亦稱淤性浮鬆難以開槽打樁乃自建石工一律穩固堅實可見事在人為該處改建石工所費不過較前三分之一方今府藏充盈即多費數十萬帑金捍衛民生使閭閻永臻樂利亦所不靳也四十九年

上親視海塘工程

諭浙海建築石塘所以保障民生自應於石塘既建後
砌築坦水保護塘根乃督撫惟云柴塘必不可廢此
受工員慫恿為後日歲修冒銷地步况添建石塘原
欲留柴塘為重門保障並未令其拆去若如該督撫
言復加歲修安用費此數百萬帑金為耶又石塘之
前柴塘之後見有溝槽一道槽內積水並無去路將
來日積日甚石塘根脚勢必淹浸滲漏該督撫亦並

未慮及又石塘上堆積土牛甚屬無謂設遇異漲又
豈幾尺浮土所能抵禦所有塘上土牛即著填入積
水溝槽之內仍將柴塘後之土順坡斜做祇露出石
塘三四層為度并於其上栽種柳樹俾根株蟠結塘
工益資鞏固如此則石柴連為一勢即以柴塘為石
塘之坦水至范公塘一帶亦需一律接建石工方於
省城永資鞏護著自新築石塘工止處之現做柴塘
及挑水段落起至硃筆圈記處止再接再築至烏龍廟

止一體添築石塘子限五年分段從東而西陸續修築以期海疆永慶安瀾



皇朝通志卷九十六